



## CONCELLO DE BEGONTE

### ORDENANZA MUNICIPAL PARA A INSTALACIÓN E FUNCIONAMENTO DE INSTALACIÓNS DE TELEFONÍA MÓBIL PERSOAL E OUTROS SERVIZOS DE TELECOMUNICACIÓNS E DE DIFUSIÓN, NO CONCELLO DE BEGONTE .

#### EXPOSICIÓN DE MOTIVOS

O extraordinario desenvolvemento das tecnoloxías da telefonía móbil e outros servizos de telecomunicación, obriga aos concellos a adoptar, no marco das competencias que lles son propias, as medidas precisas en orde a evitar que a instalación dos distintos aparellos e equipos non xeren efectos negativos sobre a paisaxe urbana e natural do termo municipal, así como que o seu uso non prexudique a saúde dos seus residentes. Coa finalidade sinalada, considerase xustificada a elaboración e aprobación por parte de este Concello de Begonte dunha Ordenanza Municipal propia sobre antenas emisoras de telefonía móbil e outros servizos de telecomunicacións.

O proceso de implantación das operadoras e o rápido crecemento do mercado están creando unha serie de disfuncións que, como se dixo, provocan a necesaria intervención da administración local neste proceso.

Ademais, o nivel de incidencia que a instalación das diferentes operadoras está xerando dentro da paisaxe urbana e rural, non debe deixar de lado a adopción de certas cautelas en relación coa saúde física e psicolóxica dos cidadáns.

Así, esta Ordenanza ten como obxectivo a regulamentación das condicións urbanísticas aplicables á localización, instalación e funcionamento dos elementos e equipos de telecomunicación, sempre dende a busca da maior protección tanto medioambiental como sanitaria.

En todo caso, a Administración favorecerá aquelas infraestruturas que produzan un menor impacto visual e ambiental sobre o entorno e primordialmente aquelas que entrañen un menor risco para a salubridade na súa área de influencia.

Tendo en conta o Informe que en relación coa perigosidade para a saúde humana das antenas base de telefonía móbil emitido pola Consellería de Sanidade e Servizos Sociais de data de 9 de outubro do 2000 baseado en parte nos estudos presentados por diferentes organismos, tales como o Institute of Electronic and Electronics Engineers and American National Standards



## CONCELLO DE BEGONTE

Institute, International Comision on Non Ionizing Radiation Protection (ICNIRP), National Councilon Radiation Protection and Measurements, Comiffe European de Normalization Electrotechnique, International Radiation Protection Association, Federal Communications Comision, consideramos os efectos psicolóxicos negativos provocados por o temor a estas instalacións en parte importante da poboación; temor que en ocasións xera cadros de ansiedade, de estrés ou depresión. Manifestacións que se expresan de maneira constante nos medios de comunicación e que se traducen en esixencias de maior control as autoridades locais. Débese ter en conta, ademais, tanto o principio de precaución como o de prevención recomendado pola OMS e a Unión Europea así como as recomendacións das Conferencias Internacionais de expertos sobre emprazamentos de antenas de telefonía móbil; as normativas de certos países, comunidades autónomas e concellos claramente sensibilizados coa protección medioambiental , e en xeral a obriga das Administracións Públicas de velar pola saúde e o benestar dos seus cidadáns.

Encontrámonos ante unha Ordenanza de carácter urbanístico, sen esquecer a incidencia real das súas determinacións sobre outras áreas e competencias municipais de distinta orde. Os concellos encóntranse lexitimados para a emisión deste tipo de Ordenanza de acordo coas competencias que lles outorga o artigo 25, parágrafo 2º, da Lei 7/1 985, do 2 de abril, Reguladora das Bases do Réxime Local, en materias como a ordenación, xestión, execución e disciplina urbanística (Art.25.2.d.), o Patrimonio Histórico-Artístico (art.25.2.e.), a protección do medio ambiente (art.25.2.f.), ou a salubridade pública (art.25 .2 .h.).

Ó abeiro do disposto nos artigos 194 da Lei 9/2002, do 30 de decembro, de ordenación urbanística e protección do medio rural de Galicia e o art. 10 do Decreto 28/1999, do 21 de xaneiro, polo que se aproba o Regulamento de Disciplina Urbanística, estará sometida a licenza municipal a instalación no noso termo municipal de elementos e equipos de telecomunicación. Sen prexuízo da regulación urbanística municipal contida nesta Ordenanza, será plenamente aplicable e de obrigado cumprimento a normativa sectorial específica reguladora do sector das telecomunicacións, constituída na actualidade basicamente pola Lei 32/2003, de 3 de novembro, Xeral de Telecomunicacións; o Real Decreto-Lei 1/1998, de 27 de febreiro e o Real Decreto 401/2003, de 4 de abril sobre infraestruturas comúns de telecomunicación, así como as regulamentacións e especificacións técnicas relativas ás distintas clases de instalacións e



## CONCELLO DE BEGONTE

equipos desta índole; o Real Decreto de 1066/2001, do 28 de setembro, polo que se aproba o Regulamento que establece as condicións de protección do dominio público radioeléctrico, restricións ás emisións radioeléctricas e medidas de protección sanitaria fronte a emisións radioeléctricas, así como a lexislación vixente ou que, no seu caso, puidera aprobar a Comunidade Autónoma de Galicia nas materias afectadas pola presente Ordenanza. Da ordenanza destacaremos, ademais, os seguintes puntos:

- A consideración concreta do modelo de asentamento poboacional no término municipal que, con independencia da clasificación urbanística do solo, vén cualificado pola inexistencia dun centro urbano, vila ou aglomeración urbana, de tal maneira, que o servizos poden prestarse, agás situacións excepcionais nas que técnicamente sexa imposible salvar a situación de “sombra” ou falta de sinal, mediante instalacións situadas fóra do solo urbano.

- A obriga de presentar un Plan de desenvolvemento para as operadoras que teñan a función de prover ós Concellos de información necesaria para a toma de decisións.

-Establecelo uso conxunto de infraestruturas entre as operadoras, alí onde sexa tecnicamente axeitada.

- Establecer limitacións de implantación por impacto paisaxístico e por criterios de non afectación á saúde das persoas, por afectación de núcleos históricos.

-Impoñe-la normativa vixente sobre seguridade para as persoas de este tipo de instalacións. Por último, sinalar que a intervención administrativa municipal no ámbito ambiental pode quedar condicionada á actuación normativa da Xunta.

Por último, sinalar que a intervención administrativa municipal no aspecto ambiental pode quedar condicionada á actuación normativa da Xunta, mediante a Comisión correspondente, que determinará a incorporación definitiva deste tipo de instalacións ó anexo ou anexos máis apropiados do Decreto 2414/1961 de 30 de Novembro, polo que se aproba o Regulamento de Actividades Molestas, Nocivas, Insalubres e Perigosas.

### **CAPÍTULO I.**

#### **Disposicións Xerais.**

##### **Artigo 1. Obxecto.**

A presente Ordenanza regula as condicións de ubicación e instalación da infraestrutura de telecomunicacións no Concello de Begonte, constituídas por instalacións de telefonía móbil



## CONCELLO DE BEGONTE

persoal e outros servizos de telecomunicacións e de difusión, ó fin de compatibilizar a funcionalidade de tales elementos e equipos, e a utilización polos usuarios dos servizos de telecomunicación cos niveis de calidade requeridos, coas esixencias de preservación da paisaxe urbana e natural, de minimización da ocupación e o impacto visual, mediambiental e sanitario que a súa implantación poida producir e, en especial, salvagardar o dereito dos cidadáns ao mantemento dunhas condicións que non afecten a súa saúde física e psicolóxica.

### **Artigo 2. Normas xerais.**

A instalación de equipos e elementos de telecomunicacións, ten que estar expresamente autorizada polo Concello de Begonte, e estará suxeita ó cumprimento das condicións que se establezan nesta Ordenanza, a que determinará cales destas instalacións serán suxeitas á previa licenza municipal e ó procedemento administrativo pertinente.

### **Artigo 3. Finalidades**

Esta Ordenanza ten por finalidades:

- a) A protección da saúde dos cidadáns ante as posibles consecuencias que as ondas electromagnéticas poden ocasionar sobre a mesma.
- b) A harmonización do despliegue das redes de radiocomunicación coa finalidade de protección no medioambiente.
- c) A integración das estacións base de telefonía móbil e outras estacións de radiocomunicacións no entorno urbanístico e territorial.

## **CAPÍTULO II.**

### **Programa de implantación e de desenvolvemento.**

#### **Artigo 4.**

As operadoras de radiocomunicación estarán suxeitas á aprobación de un Plan de Implantación e Desenvolvemento do conxunto de toda a rede que contemple as estacións fixas xa existentes e as previsións de implantación e desenvolvemento do conxunto de toda a súa rede dentro do termo municipal.

Dito plan proporcionará a información necesaria para a adecuada integración destas instalacións na ordenación medioambiental e territorial e asegurar o cumprimento das limitacións establecidas na lexislación vixente.



## CONCELLO DE BEGONTE

### Artigo 5. Contido do Plan de Implantación e Desenvolvemento

#### 1. Con carácter xeral:

- a. Esquema xeral da rede, indicando os principais modos e localización da cabeceira, enlaces e posibles alternativas.
- b. Descrición dos servizos prestados e tecnoloxías utilizadas.
- c. Programa e calendario de execución das novas instalacións.

#### 2. Para cada emprazamento:

- a. Disposición do terreo, accesos e subministros.
- b. Cualificación urbanística do solo, afeccións medioambientais e do patrimonio histórico-artístico.
- c. Posibilidade de uso compartido.
- d. Definición da tipoloxía das instalacións para cada emprazamento, mencionando: a xustificación da solución técnica proposta, altura do emprazamento e altura das antenas do sistema radiante, área de cobertura, marxe de frecuencias e potencia de emisión, número e tipo de antenas, así como calquera outro requisito de carácter técnico esixido pola lexislación vixente.
- e. Previsión das áreas de nova implantación de equipos xustificando a cobertura territorial prevista.
- f. Incidencia dos elementos visibles da instalación sobre os elementos que se consideran protexidos e que afecten á paisaxe urbana ou ó entorno medioambiental nos supostos nos que a ubicación se realice en solo non urbanizable.

#### 3. A información gráfica sinalará os lugares de emprazamento, con coordenadas UTM e sobre a cartografía seguinte:

- a) A escala 1:25.000 para instalacións que se empracen na demarcación non urbana.
- b) A escala 1:2.000 para as instalacións que se empracen na demarcación urbana.

#### 4. A presentación do Plan de Inplantación e Desenvolvemento farase por triplicado e deberá acompañarse da correspondente solicitude cos requisitos formales de carácter



## CONCELLO DE BEGONTE

xeral que determina a Lei 30/1992, do 26 de novembro, do Réxime Xurídico das Administracións Públicas e o Procedemento Administrativo Común.

### **Artigo 6 Criterios de Implantación.**

Na planificación das instalacións radioelétricas, os titulares das mesmas deberán ter en condideración, entre outros criterios, os seguintes:

- a) A situación, características e condicións de funcionamento das estacións radioelétricas deben minimizar os niveis de exposición do público en xeral ás emisións radioelétricas con orixe tanto nestas como, se é o caso, nas terminais asociadas ás mesmas, mantendo unha adecuada calidade do servizo.
- b) As instalacións deberán de utilizar a mellor tecnoloxía dispoñible, sempre que sexa compatible coa minimización do impacto visual e medioambiental.
- c) Os plans de implantación faranse axustar ós correspondentes proxectos técnicos, aprobados polo Ministerio de Ciencia e Tecnoloxía, cando se trata de servizos finais ou portadores e de difusión de conformidade co establecido na lexislación de aplicación.
- d) A compartición de emprazamentos podería estar condicionada pola conseguinte concentración de emisións radioelétricas.
- e) De maneira particular, a ubicación, características e condicións de funcionamento das estacións radioelétricas debe minimizar, na súa maior medida posible, os niveis de emisión sobre espazos sensibles, tales como escolas, centros de saúde, hospitais, parques públicos e vivendas.

### **Artigo 7. Tramitación**

O Plan de Implantación será sometido a información pública por un termo mínimo dun mes, mediante a publicación no Diario Oficial de Galicia, no Boletín Oficial da Provincia, nun diario de gran circulación e no taboleiro de anuncios municipal. Os gastos que xeren estas publicacións correrán a cargo do solicitante.

Na tramitación será preceptivo o informe favorable de quen teña atribuída as competencias urbanísticas e medioambientais do Concello.

A competencia para resolver a petición corresponde ó Alcalde ou ó Organo que legalmente teña atribuída a competencia para o outorgamento de licencias de actividade.



## CONCELLO DE BEGONTE

A aprobación deste Plan de Implantación será condición indispensable para que os municipios poidan outorgar as licencias pertinentes para o establecemento das instalacións. A concesión dunha licenza municipal sen a previa aprobación administrativa do Plan será nula de pleno dereito.

### **Artigo 8. Actuacións de modificación do Plan de Implantación.**

As operadoras deberán comunicar calquera modificación ó contido do Plan de Implantación presentado, solicitando, se é o caso, ó órgano competente para a súa aprobación a súa actualización e correspondente aprobación para poder proceder a facer efectivos ditos cambios.

### **Artigo 9. Vixencia.**

Os Plans de Implantación terán unha vixencia de dous anos. Trancurrido este prazo, os operadores adaptarán o plan ou presentarán un novo de cobertura actualizada.

En todo caso non se autorizará ningunha instalación que non cumpra as determinacións que se establecen no anexo que se incorpora á presente Ordenanza.

## **CAPITULO III.**

### **Límites de exposición, condicións tecnolóxicas de protección ambiental e de seguridade das instalacións.**

#### **Artigo 10. Límites de exposición ás emisións radioelétricas. Restriccións básicas e niveis de referencia.**

De conformidade coas previsións da Lei 14/1986, de 25 de abril, Xeral de Sanidade, de acordo coa Resolución do Consello de Ministros de Sanidade da Unión Europea, de 12 de xullo de 1999, e co fin de garanti-la axeitada protección da saúde do público en xeral, aplicaranse os límites de exposición que figuran no Anexo II do Real Decreto 1066/2001, de 28 de setembro, polo que se aproba o Regulamento que establece as condicións de protección do dominio público radioelétrico, restriccións ás emisións radiolétricas e medidas de protección sanitaria fronte a emisións radioelétricas.

Tódalas instalacións a que fai referencia esta ordenanza, deberán cumprir as condicións que se establecen no Real Decreto 1066/2001, de 28 de setembro, antes referenciado.

#### **Artigo 11. Normas de protección ambiental. Prohibicións e limitacións ás instalacións.**



## CONCELLO DE BEGONTE

1. As instalacións de telefonía móbil, deberán situarse en solo rústico, en calquera da súas categorías, sempre que tal uso sexa compatible cos permitidos pola lexislación urbanística, a unha distancia superior a trescentos metros de edificios habitados, especialmente vivendas e edificacións ou construción de concurrencia pública.

A igual distancia deberán ubicarse en relación a centros hospitalarios e xeriátricos, centros educativos, escolas infantís, parques públicos, áreas recreativas e lugares análogos en todos aqueles espazos que se definan regulamentariamente como de especial risco.

As instalacións deberá procurar a máxima redución do impacto visual, conseguindo o adecuado mimetismo coa paisaxe.

2. Con carácter xeral e, sen prexuízo da normativa específica, non poderán establecerse instalacións de radiocomunicación nos bens inmobles de interese cultural declarados monumentos pola Lei do Patrimonio Histórico e nos espazos naturais protexidos cualificados coa categoría de Microreservas e Monumentos Naturais pola Lei de Conservación da Natureza. Limitaranse as instalacións nos conxuntos histórico-artísticos, zonas arqueolóxicas e xardíns declarados como bens de interese cultural, así como no resto de categorías de espazos naturais protexidos, obrigándose a incorporar as medidas de mimetización ou as solucións específicas que minimicen o espazo visual.

3. No solo urbanizable de uso industrial, sen plan de sectorización ou, no seu caso, sen plan parcial aprobados, autorizarase a implantación destas instalacións con carácter provisional.

4. No solo de núcleo rural somentes se autorizarán nas zonas de expansión, sempre e cando a súa implantación se realice respectando en todo caso a distancia establecida no parágrafo primeiro deste artigo.

5. Atendendo á especial configuración dos asentamentos de poboación do noso municipio, no que non existe unha aglomeración propiamente urbana, como regra xeral, non se autorizarán antenas base de telefonía móbil en solo urbano. Excepcionalmente, poderán autorizarse estas instalacións cando o solicitante acredite que técnicamente non é posible dar cobertura dende o solo rústico ou urbanizable inmediato ó urbano. En todo caso, será de aplicación á distancia prevenida no parágrafo 1º deste artigo.

En calquera caso o límite de densidade de potencia axustarase ó Real decreto 1006/2001





## CONCELLO DE BEGONTE

### **Artigo 12. Outras restricións ós niveis de emisións radioeléctricas.**

Sen prexuízo da remisión que se realizou no artigo 10 ós límites de exposición ás emisións radioeléctricas contempladas no artigo 6 do Real Decreto 1066/2001 toda estación radioeléctrica virá limitada nos seus niveis de emisión por calquera das seguintes condicións:

- a) A existencia de interferencias perxudiciais ou incompatibilidades con outros servizos de telecomunicacións previamente autorizados ou con outros servizos públicos esenciais.
- b) As limitacións impostas polo Cadro Nacional de Atribución de Frecuencias.
- c) A existencia, fora da zona de servizo autorizada á estación, de niveis de intensidade de campo electromagnético superiores ós máximos establecidos.

### **Artigo 13.**

O Concello, de forma xustificada, por razóns urbanísticas, medioambientais ou paisaxísticas, e dando audiencia ós interesados, establecerá a obriga de compartir emprazamento por parte das diferentes operadoras, seguindo os trámites previstos na normativa estatal sobre utilización compartida de instalacións de telecomunicacións, de acordo cos Plans de desenvolvemento propostos. En todo caso, a obriga de compartir pódese desestimar se as operadoras xustifican a imposibilidade técnica ou o Concello considera que o impacto medioambiental ou visual do uso compartido poida ser superior ó de instalacións de radiocomunicación que se pretendan instalar separadamente. No caso de uso compartido, o custe do uso deberá asumirse integramente polas empresas operadoras de servizos de radiocomunicación, exercendo o Concello funcións de arbitraje en caso de desacordo.

## **CAPÍTULO IV**

### **Réxime xurídico das licenzas sometidas a esta ordenanza**

#### **Artigo 14. Suxeición a licenza**

Conforme ós artigos 194 da Lei 9/2002, de 30 de decembro, de ordenación urbanística e protección do medio rural de Galicia, modificada pola Lei 15/2004, do 29 de decembro, e o artigo 10 do Decreto 28/1999, de 21 de xaneiro, polo que se aprobou o Regulamento de Disciplina Urbanística para o Desenvolvemento e aplicación da Lei do solo de Galicia, estará sometida a licenza municipal a instalación con obra, no seu caso, dos equipos de telecomunicación, e especialmente as estacións base de telefonía móbil.

#### **Artigo 15. Determinación dos requisistos para a autorización.**



## CONCELLO DE BEGONTE

1. Os operadores que establezan redes soporte de servizos de radiodifusión sonora e televisión e os titulares de licenzas individuais, presentarán un estudo detallado, realizado por técnico competente, que indique os niveis de exposición radioelétrica en áreas cercanas as súas instalacións radioelétricas nas que poidan permanecer habitualmente persoas.

Os mencionados niveis de exposición, valorados tendo en conta o entorno radioelétrico, deberán cumprir-los límites establecidos no Anexo II do Real Decreto 1066/2001, ó que xa nos remitimos no artigo 10 desta Ordenanza.

O citado estudo será presentado ante o Ministerio de Ciencia e Tecnoloxía, incorporado no proxecto ou proposta técnica necesarios para solicita-la autorización das instalacións radioelétricas, segundo o establecido no Regulamento de aplicación da Lei, xeral de Telecomunicacións, no relativo ó uso do dominio público radioelétrico.

1. Os operadores e titulares de licenzas individuais presentarán, simultaneamente e de xeito complementario ó estudo citado, un proxecto de instalación de sinalización e, se é o caso, valado que restrinxa o acceso do persoal non profesional á zona das obras.
2. Sen prexuízo do establecido no apartado primeiro deste artigo, a aprobación definitiva das instalacións estará condicionada á non superación dos límites de exposición xa especificados.
3. Non poderán establecerse novas instalacións radioelétricas ou modificarse as existentes cando o seu funcionamento supoña a superación dos límites de exposición permitidos.

### **Artigo 16**

Na solicitude e tramitación das licencias urbanísticas para as instalacións de radiocomunicación en calquera clase de solo, a mencionada licencia somentes se poderá outorgar previa aprobación do Plan de Implantación e sempre que este Plan se axuste ás súas previsións ou ás progresivas actualizacións.

### **Artigo 17. Licenzas no solo rústico**

Requisitos para a petición e tramitación das solicitudes de licencia urbanística para as instalacións de radiocomunicación en solo non urbanizable.

1. A tramitación axustarase ó establecido nesta Ordenanza con carácter xeral, coa salvidade referida no apartado seguinte.



## CONCELLO DE BEGONTE

2. O Concello trasladará o expediente ó Órgano da Consellería de Política Territorial, Obras Públicas e Transportes competente na materia, logo da tramitación prevenida polo artigo 41 da Lei 9/2002, antes referenciada aos efectos da autorización autonómica previa.

### **Artigo 18. Disposicións xerais aplicables ás licencias.**

1. Coas solicitudes de licenza relativas ás actividades reguladas nesta ordenanza que precisen de licenza municipal, aportarase a seguinte documentación:
  - a) Solicitude en impreso regulamentario
  - b) Memoria descriptiva e xustificativa das obras e instalacións con fotomontaxes e simulación gráfica do impacto visual na paisaxe arquitectónica urbana.
  - c) Planos a escala axeitada das obras e das instalacións, da localización da instalación na construción ou no edificio e do trazado do cableado se a instalación proxectada se realizara na fachada exterior.
  - d) Certificación da acreditación oficial da empresa responsable das obras e instalacións.
2. Concederase simultaneamente a licenza que autorice as obras e a que autorice a instalación e o funcionamento da actividade ou instalación nas condicións reflectidas no documento da licenza, sen prexuízo das comprobacións que a administración municipal considere procedente realizar no exercicio das facultades de control e de disciplina que a normativa vixente lle outorga.
3. A documentación que se acompañará á solicitude, da que se adxuntarán tres copias, presentarase no Rexistro Xeral do Concello. Esta documentación acompañarase da documentación acreditativa do cumprimento das obrigas tributarias que determinen as Ordenanzas Fiscais correspondentes.
4. A falta desta documentación, á que fai referencia o artigo anterior, deberá solucionarse no prazo de 10 días a partires da notificación que sobre estes efectos emita o Concello ó interesado. A non subsanación en prazo comportará ter por desistido ao solicitante.
5. Conferirase un trámite de audiencia ós interesados que poidan resultar afectados polo outorgamento da licenza.



## CONCELLO DE BEGONTE

6. As licencias para a instalación de servizos de radiocomunicación poderán revisarse a instancia do Concello cando transcurran como mínimo, dous anos dende a súa autorización ou última revisión, sempre que a evolución tecnolóxica faga posible aplicar solucións que diminúan o impacto visual ou as modificacións do entorno fagan necesario reducir aquel impacto.
7. A competencia para resolver a petición corresponde ó Alcalde-Presidente. A resolución concedendo ou denegando a licenza urbanística deberá dictarse no prazo de tres meses dende a entrada da solicitude no Rexistro. O cómputo do prazo de resolución quedará en suspenso durante o prazo que se conceda ó interesado para solucionar deficiencias, prazo de suspensión que non poderá exceder de tres meses. O réxime do silencio administrativo será o establecido pola Lei 9/2002, entes referenciada.
8. No suposto de licenzas para instalación e actividades cualificadas polo órgano competente da Comunidade Autónoma, estarase en canto a prazos e réxime de silencio administrativo ao prevenido polo Regulamento de Actividades Molestas, nocivas, insalubres e perigosas.

### **Artigo 19. Disposicións particulares aplicables ás actividades clasificadas.**

1. No suposto de actividades clasificadas polo órgano ambiental competente da Comunidade Autónoma, ademais da documentación requirida con carácter xeral polas normas de procedemento establecidas nos instrumentos de planeamento municipal que sexa necesaria e congruente coa natureza e características da instalación de que se trate, requirirase a presentación de proxecto técnico asinado por técnico competente e visado polo correspondente colexio profesional no que se inclúa, como mínimo, a seguinte documentación.

1.1. Estudio ambiental que describa con detalle a posible incidencia da súa implantación e funcionamento no medio natural exterior e interior das edificacións e construcións do seu entorno, con indicación dos seguintes datos:

- ❑ Acreditación do cumprimento das normas e directrices dictadas polos órganos competentes da Administración do Estado en materia de saúde ambiental. A estes efectos, aportarase a xustificación da aprobación do Proxecto Técnico polo Ministerio de Ciencia e Tecnoloxía.



## CONCELLO DE BEGONTE

- ❑ Impactos ambientais producidos por ruídos e vibracións e pola expulsión forzada de aire quente ou viciado.
- ❑ Impacto visual na paisaxe arquitectónica urbana
- ❑ Medidas correctoras que se propoñen adoptar para eliminar ditos impactos e o grao de eficacia previsto.

1.2 Documentación gráfica ilustrativa do impacto visual da instalación dende o nivel da vía pública e xustificativa da localización e da solución de instalación na que se inclúan:

a. Fotomontaxes:

- a) Frontal de instalación (cando fose posible)
- b) Lateral dereito: dende a beirarrúa contraria da vía, a 50 metros da instalación.
- c) Lateral esquerdo: dende a beirarrúa contraria da vía, a 50 metros da instalación.

Se o estimasen procedente os servizos técnicos municipais, deberá aportarse ademais, simulación gráfica do impacto visual dende a perspectiva da visión do viandante ou dende outros puntos.

b. Plano, a escala axeitada, da localización da instalación e do trazado cableado ( a súa situación nos trazados verticais e horizontais), se se realiza a instalación en fachada exterior.

1.1 Farase referencia ó Plan de Implantación previamente aprobado que contemple as características da instalación para a que se solicita a licencia.

1.2 Medidas correctoras adoptadas para a protección contra as descargas eléctricas de orixe atmosférico.

1.3 Declaración ou compromiso de mante-la instalación en perfectas condicións de seguridade, estabilidade e ornamentación.

2. Será preceptivo o informe favorable dos servizos técnicos municipais e, cando proceda segundo a normativa sectorial aplicable, o informe dos órganos ou institucións competentes en materia de protección do patrimonio histórico-artístico natural.



## **CAPÍTULO V**

### **Inspección, revisión e conservación**

#### **Artigo 20. Inspección e certificación das instalacións radioelétricas.**

1. Será requisito previo á utilización do dominio público radioelétrico por parte dos operadores, a inspección ou recoñecemento satisfactorio das instalacións polos servizos técnicos competentes da Administración Xeral do Estado.
2. As instalacións radioelétricas realizaranse por instaladores de telecomunicacións inscritos, para o tipo correspondente de Telecomunicación, segundo o disposto no Real Decreto 279/1999, de 22 de febreiro, polo que se aproba o Regulamento Regulador das Infraestructuras Comúns de Telecomunicacións para o Acceso ós Servizos de Telecomunicación no Interior dos Edifícios e da Actividade de Instalación de Equipos e Sistemas de Telecomunicacións.
3. Os titulares de licencias individuais, deberán remitir ao Ministerio correspondente, no primeiro trimestre de cada ano natural, unha certificación emitida por técnico competente de que se respetaron os límites de exposición establecidos no artigo 10 desta Ordenanza durante o ano anterior. Este Ministerio poderá ampliar esta obriga a titulares doutras instalacións radioelétricas.

#### **Artigo 21. Conservación e revisión.**

Os operadores están obrigados a manter as súas instalacións nas debidas condicións de seguridade, estabilidade e conservación e contribuír a reduci-los niveis de emisión dos sistemas de radiantes e a minimiza-lo impacto ambiental e visual de acordo cos fins desta ordenanza.

Os operadores terán que revisa-las instalacións anualmente, notificando no prazo de tres meses ao Concello a acreditación de dita revisión.

Os titulares das instalacións estarán obrigados a subsana-las deficiencias de conservación nun prazo máximo de quince días a partires da notificación da irregularidade. Cando existan situacións de perigo para as persoas ou bens, as medidas deberán de adoptarse de forma inmediata.

Nos supostos de cese definitivo da actividade ou existencia de elementos da instalación en desuso, o operador, ou se é o caso, o propietario das instalacións deberán realizar as



## CONCELLO DE BEGONTE

actuacións necesarias para desmantelar e retirar-los equipos de radiocomunicación ou os seus elementos, e deixa-lo terreo, a construción ou edificio que sirva de soporte a dita instalación, no estado anterior ó establecemento dos mesmos.

Cando os servicios municipais detecten un estado de conservación deficiente, comunicarao ós titulares da licenza para que adopten as medidas oportunas no prazo de quince días ou inmediatamente en caso de urxencia. De non ser así, a instalación poderá ser retirada polos servicios municipais, a cargo do obrigado.

### **Artigo 22. Obrigados ó cumprimento.**

Quedan especificamente obrigados ó cumprimento da presente Ordenanza as empresas operadoras de telefonía móbil persoal e doutros servicios de telecomunicación e difusión, titulares das instalacións e antenas.

En caso de incumplimento dos preceptos desta Ordenanza, os servicios técnicos municipais poderán ordear-la adopción das medidas que acaden o efecto de restaurar-la legalidade infrinxida, segundo o que establece o Regulamento de Disciplina Urbanística de Galicia e demais normativa urbanística aplicable.

A execución das órdenes de desmontaxe e retirada das instalacións de antenas realizarase polas empresas titulares da instalación no prazo máximo de quince días ou inmediatamente en caso de urxencia.

As medidas de execución subsidiaria son independentes e compatibles coas que se poidan impoñer en concepto de sanción.

## **CAPÍTULO VI**

### **Réxime de protección da legalidade e sancionador das infraccións.**

#### **Artigo 23. Protección da legalidade.**

As accións ou omisións que vulneren o disposto nesta Ordenanza poderán motivar a adopción das medidas que a continuación se establecen:

- a) Restitución da orde urbanística vulnerada
  - b) Imposición de multas ós responsables trala tramitación do correspondente procedemento sancionador.
2. En todo caso, a Administración municipal adoptará as medidas tendentes a repoñe-los bens afectados ó estado anterior á produción da situación ilegal.



## CONCELLO DE BEGONTE

### Artigo 24. Infraccións e sancións.

As sancións ou omisións que vulneren o disposto nesta ordenanza respecto das normas urbanísticas sobre localización, instalación e funcionamento dos equipos de telecomunicación constitúen infraccións urbanísticas que serán sancionadas de conformidade co establecido na normativa urbanística vixente e nos artigos seguintes.

### Artigo 25. Clasificación das infraccións.

1. As accións ou omisións que vulneren o disposto nesta Ordenanza constitúen infraccións urbanísticas que poden ser cualificadas como moi graves, graves ou leves:
2. Son infraccións moi graves:
  - ┌ A construción de instalacións que non estean incluídas nos Plans de Implantación.
  - ┌ O funcionamento da actividade superando os niveis máximos de emisión de radiacións e distancias de seguridade legalmente vixentes.
3. Son infraccións graves:
  - ┌ A instalación con obras, se é o caso, sen licenza dos equipos de telecomunicación ós que se refire o artigos 15 e seguintes desta Ordenanza.
  - ┌ O funcionamento da actividade cos seus equipos de comunicacións ós que se refire o artigo 15 e seguintes desta Ordenanza sen respecta-las condicións que figuren incorporadas á autorización ou licenza concedida.
  - ┌ O incumprimento dos deberes de conservación, certificación, revisión e retirada das instalacións dos equipos de telecomunicacións ós que se refiren os artigos 21 e 22 desta Ordenanza.
  - ┌ O incumprimento dos prazos de adecuación das instalacións existentes establecidos na Disposición Transitoria Única do Real Decreto 1066/2001, de 28 de setembro.
4. Son infraccións leves:
  - ┌ As accións ou omisións que vulneren o disposto nesta Ordenanza relativas á instalación de equipos de telecomunicacións ós que se refire no seu artigo 16.





## CONCELLO DE BEGONTE

┌ En todo caso, cando no procedemento sancionador se demostre a escasa entidade do dano producido ós intereses xerais, as accións ou omisións que vulneren o disposto nesta Ordenanza serán cualificadas como infraccións leves.

### Artigo 26. Sancións.

1. A determinación das sancións que corresponda impoñer por comisión das infraccións tipificadas nesta ordenanza realizaranse da seguinte maneira:

- a) Sancionarase con multa do 1% ó 5% do valor da obra, instalación ou actuación realizada, a comisión das infraccións leves ás que se refire o artigo 25.4 da Ordenanza.
- b) Nos supostos previstos no seu artigo 25.3 aplicaranse as seguintes:
  - Serán sancionados con multa do 1% ó 15% do valor das obras complementarias que fose necesario realizar para cumpri-los deberes contemplados nos artigos 21 e 22 desta Ordenanza, calculado polos servizos técnicos municipais.
  - Serán sancionados con multa do 5% ó 15% do valor da instalación, calculado polos servizos técnicos municipais, quenes realicen as actuacións previstas nesta ordenanza sen licencia, sempre que ditas actuacións fosen legalizables.
  - Serán sancionadas con multa do 15% ó 30% do valor da instalación, calculado polos servizos técnicos municipais, quenes realicen as actuacións previstas nesta ordenanza sen licencia, sempre que ditas actuacións non fosen legalizables.
  - Serán sancionados con multa do 15% ó 30% do valor da instalación, calculado polos servizos técnicos municipais, quenes non adecúen as instalacións existentes dentro dos prazos establecidos na Disposición Transitoria Única do Real Decreto 1066/2001, de 28 de setembro.
- c) Sancionarase con multa do 30% ó 50% do valor da obra, instalación ou actuación realizada, a comisión das infraccións moi graves ás que se refire o artigo 25.2 da Ordenanza



## CONCELLO DE BEGONTE

As actuacións reguladas nesta Ordenanza que a pesar de estaren amparadas nunha licenza, se realicen en contra das condicións por ela impostas serán consideradas, para os efectos de aplicación do réxime de protección da legalidade e sancionador das infraccións correspondentes, como actuacións sen licenza e imponse a sanción de acordo cos criterios establecidos nos apartados anteriores.

### **Artigo 27. Suxeitos Responsables**

Das infraccións ás que fai referencia esta Ordenanza serán responsables solidariamente:

- a) A empresa instaladora ou a persoa física ou xurídica que dispuxera a colocación da instalación.
- b) O director técnico das obras de instalación.
- c) O propietario ou comunidade de propietarios do edificio ou terreos nos que se sitúe a antena e demais elementos da instalación.

### **Artigo 28. Criterios para a graduación das sancións.**

Para a graduación das sancións a aplicar consideraranse os seguintes criterios:

- a) A existencia ou non de intencionalidade.
- b) O resarcimento dos posibles prexuízos ocasionados con anterioridade ó acordo de inicio do expediente sancionador.
- c) A subsanación das deficiencias causantes das infraccións durante a tramitación do expediente sancionador.
- d) A natureza dos prexuízos ocasionados.
- e) A reincidencia, entendendo por tal a comisión de máis dunha infracción da mesma natureza, no termo dun ano a contar dende a firmeza da resolución da primeira.

### **Artigo 29. Suspensión do funcionamento da instalación.**

Por razóns de seguridade, ó Concello poderá acordar, tanto durante a tramitación do procedemento, como previamente á súa iniciación, como medida provisional, a suspensión do funcionamento da instalación.

### **Artigo 30. Aplicación das sancións e prescripción.**

No relativo á aplicación das sancións previstas nesta Ordenanza, e á prescripción das infraccións tipificadas nela, estarase ó establecido sobre o particular na normativa urbanística vixente en Galicia e á restante de aplicación.



## CONCELLO DE BEGONTE

### Disposición Adicional Primeira.

1. Para os efectos previstos nesta Ordenanza, as actividades nela reguladas clasifícanse en:

- ❑ Actividades inocuas.
- ❑ Actividades clasificadas

**Son actividades inocuas** as actuacións que teñen por obxecto a instalación de antenas de telefonía de reducidas dimensións, estacións para usuarios de telefonía fixa con acceso vía radio, contenedores de nodos finais de redes de telecomunicacións por cable, antenas receptoras de sinais de radiodifusión sonora e televisión, estacións de radioaficionados, así como a instalación en fachadas de cables ou canalizacións pertencentes a redes de telecomunicacións por cable.

**Son actividades clasificadas** as instalacións, cualificadas como tales polo órgano ambiental competente da Comunidade Autónoma de Galicia.

### Disposición Adicional Segunda

No prazo dun ano, contado a partires da entrada en vigor, desta Ordenanza, o Concello creará un rexistro especial no que se inscriban todas as instalacións de emisión e recepción dos servicios de telecomunicacións existentes no municipio. A inscripción rexistral realizarase de oficio ou por petición dos interesados e conterá os datos relativos ó titular da licenza e ás condicións impostas para a autorización da instalación.

### Disposición Adicional Terceira

Las obras e instalaciones reguladas en esta Ordenanza, así como la obtención de las licenzas respectivas, estarán suxeitas aos tributos previstos en las Ordenanzas Fiscais con arreglo aos preceptos destas.

### DISPOSICIONES TRANSITORIAS

#### Primera. -

As instalacións de telecomunicacións establecidas sen a debida autorización con anterioridade á data de entrada en vigor desta Ordenanza, regularizarán a súa situación no prazo de seis meses, contados dende o día seguinte ó da entreda en vigor desta Ordenanza. A estes efectos



## CONCELLO DE BEGONTE

presentarán a correspondente solicitude de legalización achegando a documentación referida nos artigos 16 e seguintes desta Ordenanza.

### DISPOSICIONES FINAIS

#### **Primera. -**

No non previsto nesta Ordenanza, estarase ao disposto na normativa Estatal e Autonómica sobre a materia.

#### **Segunda. -**

De conformidade co establecido nos artigos 70.2 e 65.2 da Lei 7/1985, de 2 de abril, reguladora das Bases de réxime local, la presente Ordenanza entrará en vigor aos quince días hábiles da súa publicación completa no Boletín Oficial da Provincia.

Begonte, 31 de xaneiro de 2008.

O Alcalde-presidente

Asdo. José Antonio Vázquez García